



TUI e TUIE:

al è disponibil il DVD dai cartons animâts par furlan




Al è stât il Museu di Cjase Cocel di Feagne il prin palc pe **presentazion publiche dal DVD de serie di cartons animâts Tui e Tuie**, "firmâts" ARLeF (Agjenzie Regjonâl pe Lenghe Furlane), denant di un public di ecezion:

une cincuantine di fruts des Scuelis de infanzie di Sunviele e Madris e de Scuele primarie di Cicunins che, cun a cjâf lis lôr insegnantis, e l'acompagnament de armoniche sunade di un frut di prime medie di Feagne, a àn recitât e cjantât cualchi filastrocje par furlan e, cun grant divertiment, a àn assistût ae proiezion di dôs aventuris di Tui e Tuie.

La ARLeF e à promovude e sostignude la version in lenghe furlane dal carton animât (realizade di Belka Media - Raja Films), cumò disponibile ancje intune biele racuelte DVD cun dentri 34 episodis, che **e podarà jessi ritirade li de ARLeF, a gratis, dai insegnants e di ducj chei che a vuelin doprâle par finalitâts ludichis e didatichis.**

Protagoniscj de animazion a son doi gjatuts blu une vore tenars, ma un pôc pastrocjons. Tui e



Tuie a son fradi e sùr. Midiant di une scjate magjiche e di une imagjinazion ferbinte a vegnin traspuartâts lontan di cjase e a vivin aventuris plenis di sorpresis e di scuvieris, imparant dai compagns di viaç

cualchi buine norme di vite sociâl. Cheste serie e ven de Russie, e je za stade trasmetude cun sucès di Disney Channel in Australie, in Gnove Zelande e in altris Paîs. Cumò e va in onde su Telefriuli, dentri de transmission Maman! e tal spazi Telefruts.

Ae presentazion, di là de **assessore Rosolen** e dal **president Eros Cisilino**, a jerin presints ancje **William Cisilino, diretôr de ARLeF; Renata Chiappino, dirigente dal Istitût comprensif di Feagne;**



Patrizia Pavatti, direttore dal Ufici scolastic regjonâl e Daniele Chiarvesio, Sindic di Feagne.

«La Agjenzie e je daûr a lavorâ cetant par furnî ai fruts prodots di cualitât par imparâ il furlan - al à marcât il president, Eros Cisilino -. Chest carton animât, cun di plu, al puarte cun se un messaç sociâl fuart, stant che al insegne ai fruts, in maniere simpatiche e lizere, piçulis regulis dal vivi civil che lis fameis a savaran dal sigûr preseâ».

Un dissen realizât dai fruts dal Istitût Comprensif di Feagne